

վեր էին կենում, շտապով տան գործերը վերջացնում, որ մայրը պիտի նրանց լավ հագցնի, թույլ տա տանից հեռանան՝ գնան իրենց դադօնէրի հետ խաղան¹¹⁸։ Մի քահանա կամենալով ցույց տալ, թե իր ժողովրդի համար ինչ մեծ աշխատանք է տարել, պարծենում էր խոսելով եկեղեցու վարագույրի մասին՝

«էհ, քանի՛-քանի՛ աղջիկ եմ ես էս վարագույրի առջև ֆուրացրել»։

Բայց ոչ միայն աղջիկներն էին այսպիսի միջոցով իրար ֆուրանքմ, այլև տղաներն էին ախպէրանքմ։ Պատահում էր, որ ինչպես բնդունված էր Հին Բայազետից նոր Բայազետ (Կամո) գաղթած հայերի մեջ, ֆուր ու ախպէր էին դառնում աղջիկն ու տղան։ Նրանք զալիս էին եկեղեցի և քահանայի առջև Ավետարանը համբուրում։ Այնուհետև ոչ ոք իրավունք չուներ որևէ կեղտոտ բան կասկածել նրանց փոխհարաբերությունների մասին։ Տղան ախպոր պես պաշտպանում էր աղջկան բոլոր դեպքերում, բայց և զրկվում էր նրա հետ ամուսնանալու իրավունքից։ Ահագին խայտառակություն և ծայրագույն անբարոյականություն էր համարվում այդ քույր-եղբայրական կապին որևէ ֆիզիկական մերձեցման բնույթ տալու փորձը։ Հայտնի չէ՝ արդյոք մեկի ամուսնության դեպքում մյուսը որևէ ձևով ունենում էր միջամտություն նրա ընտրության մեջ։ Բայց այնուհետև էլ մինչև խորին ծերություն այդ երկու անձնավորությունները պահպանում էին նախկին մտերմությունը և փոխադարձ պարտականության զգացմունքը, այս դեպքում էլ երկուսն էլ ամեն բան իրար պիտի ասեին, ամեն աշխատանքի մեջ իրար օգնեին, ամեն ուրախություն և դարդ իրար հետ բաժանեին։

¹¹⁸ Ցուցմունք Հայկանուշ Սաֆարբեկյանի (Երեմյանի)՝ Սիսիանում։